

➔ ISU

PENCEMARAN NAJIS BABI DI KAMPUNG BATU LAUT, SELANGOR

Usah tunggu wabak JE berulang



Saya pelik masalah ini berlarutan sedangkan ia berkaitan dengan penyakit berbahaya”

Nadzim Johan, Ketua Aktivas PPIM

➔ PPIM desak kerajaan negeri selesai segera isu pencemaran

Oleh Rafidah Mat Ruzki, Iah Hafiz Aziz dan Norzamira Che Noh
bhnews@bh.com.my

▀ Kuala Lumpur

Jangan biarkan wabak Japanese Encephalitis (JE) merebak semula baru hendak bertindak.

Persatuan Pengguna Islam Malaysia (PPIM) mendesak pihak berkuasa terutama kerajaan negeri menyelesaikan segera isu pencemaran najis babi dan kemungkinan penternakan haram haiwan itu di beberapa kawasan di daerah Kuala Langat.

“Selesai segera dan jangan tunggu wabak JE menyerang semula kerana isu ini sudah terlalu lama,” kata Ketua Aktivas PPIM, Datuk

Nadzim Johan (gambar). Beliau berkata PPIM pelik mengapa isu itu dibiarkan terlalu lama tanpa penyelesaian sehingga menjadi tidak terkawal dan menjejaskan kehidupan dan ekonomi rakyat.

Masih berlarutan

“Saya pelik kenapa masalah ini berlarutan dengan air yang terlalu kotor, laut tercemar seperti tiada siapa yang melihat perkara ini terjadi sedangkan ia berkaitan dengan penyakit berbahaya.”

“Takkan tiada mata yang melihat dan mengambil tindakan kerana kesan pencemaran akibat najis babi boleh dilihat dengan mudah di situ. Jabatan Alam Sekitar (JAS) perlu terus lihat dan lakukan sesuatu,” katanya.

Beliau berkata isu itu sepatutnya sudah lama selesai jika pihak bertanggungjawab melakukan sesuatu untuk mengelakkan kesan yang lebih buruk kepada masyarakat sekitar.

“Penternakan yang tidak terkawal bukan sekadar mengganggu aktiviti seharian penduduk Islam malah pencemaran yang di tahap buruk memberi kesan ke-

pada majoriti penduduk di situ,” katanya.

Beliau mengulas laporan BH mengenai masalah pencemaran najis babi yang terkutub di Kuala Langat, khususnya Kampung Batu Laut dan sekitar jeti nelayan Sungai Mekuh sehingga menjejaskan ekonomi penduduk sekitar.

Malah, antara lima hingga enam

penduduk Melayu yang menjual tanah mereka yang berada hampir dengan kandang babi kerana tidak tahan dengan pencemaran serta tanah menjadi tidak produktif.

Mengulas mengenai isu penjualan tanah, Nadzim berkata, ia menunjukkan isu berkenaan menjadi terlalu serius dan memerlukan tindakan segera.

Mahu penjelasan Pejabat Daerah

Shah Alam: Orang Besar Daerah Kuala Langat, Tengku Mohamed Tengku Harun, berkata beliau akan mendapatkan penjelasan daripada Pegawai Daerah Kuala Langat dan Yang Dipertua Majlis Daerah Kuala Langat berhubung isu pencemaran najis babi di daerah itu.

Katanya, beliau belum menerima aduan rasmi mengenainya. “Selepas dimaklumkan, saya akan bertemu Pegawai Daerah dan Yang Dipertua Majlis Daerah Kuala Langat (MDKL) untuk men-

dapatkan maklumat sebenar,” katanya.

Beliau berkata pencemaran penternakan babi secara haram itu pernah ditegur oleh Sultan Selangor, Sultan Sharafuddin Idris Shah.

“Ketika itu, saya dimaklumkan oleh pegawai daerah bahawa kerajaan negeri bersetuju memindahkan pengusaha ladang penternakan babi.

“Jika masalah ini terlalu serius, perkara ini akan diajukan kepada kerajaan negeri supaya tindakan se-

wajarnya dapat diambil,” katanya. Sementara itu, EXCO Infrastruktur dan Kemudahan Awam, Pemodenan Pertanian dan Industri Asas Tani, Zaidy Abdul Talib, menafikan penduduk yang menjual tanah seperti dilaporkan.

Katanya, semakan dengan Pejabat Tanah dan Daerah Kuala Langat, antara 2011 hingga 2016, hanya ada tujuh permohonan pindah milik tanah dikemukakan. “Ia tidak ada kaitan dengan pencemaran ternakan babi,” katanya.

Fenomena jualan tanah timbul konflik lebih besar

Komentari



Prof Emeritus Ibrahim Komoo

Ketua Kluster, Sumber Asli dan Alam Sekitar, Majlis Profesor Negara (MPN) dan Felo Utama, Institut Alam Sekitar dan Pembangunan (LESTARI), Universiti Kebangsaan Malaysia (UKM)

Penjualan tanah oleh komuniti Melayu (Islam) di kawasan Tanjung Sepat terutama di Batu Laut, Bukit Untung dan Tanjung Laut kerana usaha penternakan babi dikatakan mencemar tanah dan air di sebabkan najis babi, perlu ditangani kerajaan secara berhemah.

Penduduk terpaksa jual tanah pada harga rendah kerana sudah tidak tahan dengan bau najis dan beraskan tanah telah tidak berguna lagi.

Ini contoh nyata isu pertanian dan alam sekitar menjangkau melampaui isu pencemaran, tetapi babit aspek keharmonian kaum, khususnya kepercayaan dan agama penduduk majoriti negara.

Perancangan pembangunan wilayah, khususnya aktiviti sensitif alam sekitar dan budaya perlu diberi perhatian paling tinggi dalam pengurusan pembangunan dan alam sekitar atau sering disebut pembangunan lestari.

Rancangan pembangunan pertanian dan penternakan dalam

sebuah lembangan sungai perlu diberi perhatian kepada aktiviti tidak cemar alam sekitar hingga kepada pencemaran memudaratkan, seterusnya aktiviti mencemar yang boleh bawa konflik berkaitan kepercayaan atau agama.

Sebagai contoh, di bahagian hulu elok dibiarkan sebagai kawasan hutan, diikuti pertanian jangka panjang (kelapa sawit dan getah), pertanian kontan (sayur-sayuran), dan di bahagian hiliran penternakan, dan akhirnya di kawasan khas untuk ternak babi (amat sensitif kepada komuniti Melayu).

Lembangan sungai adalah satu sistem tertutup yang mana proses hidrologi, hidrogeologi dan ekologi berkait rapat. Contohnya, setiap titik hujan yang turun ke lembangan akan dialirkan anak sungai, bercantum dan akhirnya masuk sungai utama dan ke laut.

Air yang meresap ke tanah, bergerak lebih perlahan, muncul ke permukaan sebagai mata air, dan akhirnya ke sungai utama dan ke laut.

Oleh itu, semua pencemaran di

bagian hulu dan sepanjang anak sungai diangkut dan akhirnya mencemari hilir sungai, proses yang sering timbulkan masalah alam sekitar dan penduduk sekitar lembangan. Di Tanjung Sepat umpamanya, najis dan pencemaran ternakan babi meresap ke tanah dan berkumpul dalam kuantiti tinggi.

Setiap kali musim hujan apabila air meresap dan mengalir keluar ke sungai, ia mencemari air sungai dan seterusnya ke laut. Oleh kerana kurang kawalan pencemaran dikenakan kepada pengusaha, kadar pencemaran meningkat, bau najis semakin ketara hingga menimbulkan rasa cemas dan tidak berpuas hati komuniti Melayu yang memiliki tanah, tinggal berhampiran atau di hiliran kawasan itu.

Lebih membimbangkan, jika fenomena jualan tanah ini tidak dibendung, ia akan jadi lebih serius dan timbulkan konflik lebih besar. Tanah dibeli, kemungkinan oleh pengusaha ternakan babi, jika tidak dikawal akan meluaskan lagi la-

dang ternakan dan akhirnya mencetus pencemaran luar kawalan.

Gugat kesihatan, perpaduan Pencemaran dan impak penternakan babi bukan sahaja babit alam sekitar, tetapi kesihatan awam dan mengugat perpaduan berasaskan kepercayaan agama. Kita pastinya masih ingat, satu ketika dahulu, akibat ternakan babi di kawasan sama, negara diancam virus JE (Japanese Encephalitis).

Saya cadang supaya agensi perancang kerajaan, khususnya kerajaan negeri Selangor beri perhatian serius terhadap kawalan dan kelulusan aktiviti ternakan babi, termasuk a) kawasan ternak babi hanya boleh diluluskan di kawasan khas mengambil kira kesesuaian lokasi dan sistem hidrologi; b) kenakan syarat ketat termasuk mekanisme pemprosesan najis setempat dan kawalan pencemaran khusus; c) sebarang projek yang boleh timbulkan konflik budaya dan kepercayaan perlu dirundingi dan dapat persetujuan komuniti setempat.

PENCEMARAN NAJIS BABI DI KAMPUNG BATU LAUT, SELANGOR

MITA (FOTO HAFIZ SOHAIMI/BH)



Keadaan pencemaran akibat kandang babi di Kampung Batu Laut, Sepang, semalam.

JAS diarah siasat segera

➔ Siasatan untuk lihat bentuk pencemaran: Wan Junaidi

Oleh Nazura Ngah, Haryani Ngah dan Ahmad Suhael Adnan
bhnews@bh.com.my

► Kuala Lumpur

Jabatan Alam Sekitar (JAS) diarah menyiasat segera pencemaran najis babi di Kampung Batu Laut, Sepang. Menteri Sumber Asli dan Alam Sekitar, Datuk Seri Dr Wan Junaidi

TuanKu Jaafar berkata siasatan itu adalah untuk melihat bentuk pencemaran akibat penternakan babi di kawasan itu.

"Kita faham, kalau ada penternakan babi di satu-satu tempat, penduduk setempat akan berdepan dengan masalah bau busuk. Oleh itu, kita perlu lihat bentuk pencemaran sebelum sebarang tindakan diambil.

"Sekiranya ia menyalahti undang-undang, tindakan akan diambil ke

atas penternak terbahit dan jika ia perlu dipindahkan ke kawasan lain, kita akan bincangkan kawasan baharu yang sesuai untuk penternakan babi," katanya ketika ditemui di lobi Parlimen, semalam.

Masalah kepada penduduk

Wan Junaidi berkata, masalah pencemaran akibat penternakan babi sebelum ini pernah berlaku di kawasan berhampiran di sebuah lapangan terbang di Sarawak yang

mendatangkan masalah kepada penduduk sekitar.

Bagi mengatasi masalah itu, kandang penternakan itu diarah berpindah ke kawasan lain.

BH semalam melaporkan najis babi yang disalurkan ke sungai, bukan setakat mencemarkan persekitaran kampung hingga pantai, malah menyebabkan penduduk khususnya orang Melayu sekitar Batu Laut berpindah ke luar selepas menjual tanah tercemar.

Kemenangan kampung tercantik tinggal kenangan

Kuala Lumpur: "Saya juga mahu berpindah jika berkemampuan dan ada tanah lain."

Demikian kata, RM Raja Doorai, 54, penduduk Batu Untung, Kampung Batu Laut, yang turut menerima kesan buruk akibat pencemaran najis babi di kawasan berkenaan.

Raja Doorai, yang mengusahakan tanaman sirih berkata sudah 50 tahun dia tinggal di kampung itu dan masalah itu tidak pernah selesai sejak sekian lama.

Katanya, dia juga sudah jemu dengan pencemaran bau di sekitar rumahnya.

"Keadaan semakin buruk hari demi hari terutamanya apabila air

najis babi disimpan dalam kolam kumbahan dan dilepaskan ke dalam saliran di hadapan rumah.

"Dahulu kawasan penternakan jauh ke dalam ladang tetapi kini kandang semakin banyak dan kerana penduduk menjual tanah kepada mereka," katanya.

Aduan tiada tindakan

Raja Doorai berkata dia dan mendiang bapanya pernah membuat laporan tetapi boleh dikatakan tiada tindakan langsung malah kandang babi semakin banyak dan besar kebelakangan ini.

"Dahulu kampung ini pernah menang pertandingan kampung tercantik tetapi sekarang itu hanya

tinggal kenangan kerana tiada yang menarik boleh dikatakan kecuali kandang babi serta bau busuk sahaja," katanya.

Penduduk lain, A Sumati, 45, pula berkata, walaupun sudah 22 tahun tinggal di Batu Untung dia masih tidak lali dengan bau najis babi terutama sekali ketika berada di kuil.

"Setiap hari kira-kira jam 7.30 malam air najis babi dari kolam kumbahan dilepaskan ke saliran dan baunya sangat busuk dan tiada siapa yang boleh tahan.

"Kami sekeluarga akan tutup rapat segala pintu dan tingkap rumah untuk mengelakkan bau meoloyakan itu masuk tetapi itu tidak

menyelesaikan masalah pun," katanya.

Sumati berkata, dia bimbang masalah wabak Japanese Encephalitis (JE) akan menular semula jika kandang serta kolam kumbahan najis babi tidak diseliat dengan baik.

"Disebabkan kami sekeluarga tinggal bersebelahan dengan kandang babi, kami risau akan menjadi orang pertama terkena sebarang penyakit nanti," katanya

Dahulu kawasan penternakan jauh ke dalam ladang tetapi kini kandang semakin banyak dan kerana penduduk menjual tanah kepada mereka"

RM Raja Doorai,
Penduduk

Untuk komen e-mel ke bhnews.bh.com.my atau di laman Facebook BH Online